

funde in igne, & habebis corporalem Venerem, Saccharum Saturni intra quadrantem II, cum tartaro calcinato, ope ignis fusorii, redit in suum corpus. Quid itaque jam concludemus? Ergo hæ præparaciones mercurii, coralliorum, perlarum, Saturni, Veneris nullæ sunt, neque deducunt subiecta præparacióni corpora in melius. Atque ita non tantum Crollio, ejusmodi præparaciones summis laudibus extollenti, verum etiã ipsi experientiæ contradicemus. Atqui per Crollium non licet aliter, nisi hanc ipsius majorem, ingenua litura prorsus deleamus. Quam ipse fortè, tam inconsideratè non proposuisset, siquidem magisterii propriè ita dicti in genere namque id nominis, quodcunq; apotelesma spagyricum cõplectitur) naturam exactiùs habuisset cognitam, videlicet finis chymix, est exaltare corpora medicinalia. Hæc exaltantur, vel separatione partium purarum ab impuris, utilium ab inutilibus, cujus separationis exempla nulli non sunt obvia, vel citra sui separationem exaltantur, quod fit reductione in magisterium. Estque hoc, uti ex Paracelso alibi elucidavi, opus spagyricæ, in quo corpus integrum citrà sui separationem substantialem, per conjunctionem menstrui appropriati, & convenientis exaltatur. Talia magisteria sunt illa mercurii, coralliorum, perlarum, Veneris, Saturni, ex Crollio supra allatæ præparaciones. Tale aurum potabile Angli illius, tale quoque nostrum: Imò verò ipsa vera, & genuina, omnium tum metallorum, tum concharum, hisque affinium corporum, præparatio spagyrica, non nisi in magisterio sita est, ut rectè magisterium solis, quintam essentiam solis, esse Paracelsus affirmet. Le.